

No Servus, Diener und Habe die Ehre!

Etze kimmt dos

Nej su wos

vu Sömde, n 30. Dezembr 2023



Ingrid Zasche

Mei Auto redt mit mr

Heuer seit n Friejhjue hiert mr vill iebr de su genannte „kinstliche Intelligenz“, korz „KI“, die herich su gefehrlich ös. Ville hon Angst, se kenntn dorch KI drsetzt und iebrflissich wardn odr ausstarbn, wenn de KI-Maschinn amende gor de Macht iebnahm wiern. Obr allejne vu dan iebr 84 Millioun Deutschn tun bis jetze schunt iebr 68 Millioun seit Juhrn a Handy benitzn – und die dötn klinschn Dingr sein doch nöscht anderes wie KI. Mr kon jo ne ock vu bale iebrole har telefoniern drmitte, nej, su a Handy tut enn o Termine derönnrn (natierlich ock, wemmr se eigetrohn hout), mr kon s zun Navigiern nahm, zun Fotografiern und zun Korrigiern und Vrschickn vu dan Böldrn odr zun lebrsetzen ei ane xbeliebiche Sprouche (ock leidr ne eis Paurische). Fr bale jede Owendung houts ane „App“, die enn zum Beispiele soht, wu zengstömareng de bölichstn Tankstelln sein, wann ei dr Strouße s nächste Moul dr Obfoll gehullt word odr wosses ei dar Stodt, wu mr grode ös, fr Sehnswardichkejtn hout. S ös sugor ane Ort „Alexa“ odr „Siri“ drönne, dou kon mr röchtsch drmitte redn.

Und wal mr jo ban Autofohrn kej Handy o sei Uhrwaschl haln dorf, konnste bei enn modern Auto dei Handy iebr Bluetooth mit n „Bord-Entertainment-System“ vrbindn und dan Dinge akustisch sohn, wos de vu n hon wöllst odr wu s hiefohrn soll. Dos Juhr hout mei 17 Juhre ales Auto n Geist ufgegahn und ich ho mr a neues oschoffn missn. Dou houts r etze Meglichkejtn drönne, vu dan hout mei ales Auto ne amoul trejm kenn und ich ho ane ganz neue Ort vu Autofohrn larn missn. Su hibsche Sachen wie ane Lenkrad- oder Sitz-Heizung odr ane Rickfohrt-Kamera sein r jo noch ne amoul KI, und ou de Licht- und Handbrems-Automatik ne. Obr de automatische Kopplung vu menn Handy mit dr Bord-Elektronik ös schunt sehr ogenahm. Drbeine ho ich mrscheints noch ne amoul olle schinn Meglichkejtn entdeckt. Drletzt stond ich ei enn Stau und ho mich a bössl gespielt. „Hej Google, rufe Anton Praxl an!“ Ich ho mane Vrspätung durchgahn wolln. „Ich kann Anton Prachsel nicht finden“, wor de Antwort, und ufn Monitore worsch folsch geschriebl. Ich wusste obr, doss ich Praxln gespeichrt hotte. Dou ho ich halt dan besundern Noum buchstabiert. Praatz wur Praxl gefundn und ogerufn. Drweile wor ane WhatsApp-Nouchricht eigegangn, und mei Auto froite, eb s de Nouchricht vurlasn und amende glei beantwortn selle. Viell mieh ho ich dann ne ausprobiern kenn, wal sich dar Stau ufgeleest hout. Jednfolls tut mr sich o Komfort risch gewenn, nauer, und zun Glicke redt mei Auto ock mit mr, wenn ich dos ausdricklich hon will.

Inzwöschn göbts ei Amerika KI-Taxis, die ganz vu allejne fohrn und Programme, mit dan mr Leute und Stömmen klonen kon. Dos ös einklich toch a bössl entrisch. Mit „Chat GPT“ konnste etze ou bei uns schunt aus a poor Stichwurtn Texte ei villn Sprouchn automatisch schreiben lossn. Die sein herich ne amoul su schlaichte, ou wemmr sehr genou priefn muss, ob dos ou olles stömmt, wos de KI dou fabriziert hout. S ös tirekt gutt, doss Paurisch su ane exklusive Sprouche ös, doss mr unse Nej-su-wosse noch ne drmitte generiern kenn...

Natierlich houts r bei jedn neuen Zeuge, wos se drfindn, ou ömmr sötte Ludrkarle, die drmitte Schindludr treibn. Und dann tut mr s schlaicht machen, ou wenn s amende fr ville gude Sachn nitzlich ös. KI ös zun Beispiele ane grüße Hölfe bei dr Bekämpfung vu Krankhejtn odr Vrbrechn, zun Energiesporn odr bei Katastroufn.

No, dou tut ock etze jednfolls gut eis neue Juhr kumm und gesund bleibn und Euch halt wajgn dr KI ne örre machn lossn. Schlisslich ös dos bei olln su – wu vill Licht ös, ös vill Schortn. Mejnt dr ne ou?
